

張曲江詩集卷第一



賦

長示郭
振錄西
詩子也

歛雲嵩黃榜校

白羽扇賦 并序

玉函
延壽

開元二十四年夏盛暑奉勅使大將軍高力士
賜宰臣白羽扇其與焉竊有所感立獻賦曰
當時而用在物所長彼鴻鵠之翮羽出江湖之
下方安知煩暑可致清涼豈無紈素采畫文章
復有脩竹剡松毫芒提此乃灑灑揮動聲奇惟衆
珍之在御何知翮之敢賞而竊思於聖后上見

持於未央伊昔臯澤之時亦有雲霄之志可效
用之得所雖殺身之何忌謂商白羽如微風
縱秋氣之移奪終感恩於篋中

附御批答

朕頃賜扇聊以滌暑卿立賦之且見情素詞
高理妙朕詳之久矣然佳彼勁翮方資利用
與夫棄捐篋笥義不當也

荔枝賦并序

南海郡出荔枝焉每至季夏其實乃熟狀甚瓌
詭味特甘滋百果之中無一可比余往在西掖

嘗盛稱之諸公莫之知而固未之信唯舍人彭
城劉侯弱年遷累經于南海

聞斯談倍

復喜歎以爲甘旨之極也又謂龍眼凡果而與
荔枝齊名魏文帝方引蒲桃及龍眼相比是時
二方不通傳聞之大謬也每相顧閑議欲爲賦
述而世務卒卒此志莫就及理郡暇日追叙往
心夫物以不知而輕味以無比而疑遠不可驗
終然永屈况士有未效之用而身在無譽之間
苟無深知與彼亦何以異也因道揚其實遂作
此賦

果之美者厥有荔枝雖受氣於震方實稟精於火離乃作酸於此裔爰負陽以從宜蒙休和之所播涉寒暑而匪虧下合圍以擢本傍蔭畝而抱規紫紋紺理黛葉細枝翦鬱而霏霏環合而焚纒如蓋之張如帷之垂雲煙沃若孔翠于斯靈根所盤不高不卑陋下澤之沮洳惡層崖之嶮巖彼前志之或妄何側生之見疵爾其勾芒在辰颿風入律肇允含滋芬敷謐溢綠穗靡靡青英苾苾不豐其萃但甘其實如有意乎敦本故微文而妙質葦葑房而攢萃皮龍鱗以駢櫛

膚玉英而含津色江萍以吐日朱苞剖明璫出罔然數寸猶不可匹未玉齒而殆銷雖瓊漿而可軼彼衆味之有五此甘滋之不一伊醇淑之無準非精言之能悉聞者歡而竦企見者訝而驚仡心恚可以蠲忿口爽可以忘疾且欲神於醴露何比數之湘橘援蒲桃之見擬亦古人之深疾若乃萃軒洞開嘉賓四會時當燠煜客或煩憤而斯果在焉莫不心侈而體忭信雕盤之仙液實玳筵之綺績有終食於累百愈益氣而治內故無厭於所甘雖不貪而必愛沉羨李而

莫取浮甘瓜而自退豈一座之所榮冠四時之
爲最夫其貴可以薦宗廟其珍可以羞王公亭
十里而莫致門九重兮曷通山五嶠兮白雲江
千里兮清楓何斯美之獨遠嗟爾命之不工每
被誚於凡口罕獲知於貴躬柿何稱乎梁侯梨
何幸乎張公亦因人之所遇孰能辯乎其中哉

四言

奉和聖製燭龍齋祭

上帝臨下鑒亦有光孰云陰隲惟聖克彰六月
徂暑四郊愆陽我后其勤告于壇場精意允益

群靈鼓舞蔚今朝雲霈然時南雨我原田亦旣
有年燭龍煌煌明宗報祀予以助之天人帝子
聞詩有訓國風茲始

奉和聖製喜雨

艱我稼穡載育載亨如物應之曷聖與靈謂我
何憑惟德之馨誰云天遠以誠必至太清無雲
羲和頓轡于斯蒸人瞻彼非覲陰冥倏忽霈澤
咸泊何以致之我后之感無臯無隰黍稷黯黯
無卉無木敷芬黜黷黃龍勿來鳴鳥不思人和
年豐皇心則怡豈與周宣雲漢徒詩

南郊文武出入舒和之樂

祝史辭正人神慶叶福以德昭享以誠接六變
云備百禮斯浹祀事孔明祚流萬葉

五言

南郊太尉酌獻武舞作凱安之樂

馨香惟后德明命光天保肅祀崇聖靈陳信表
皇道王戚初蹈厲金匏既靜好介福何穰穰精
誠格穹昊

巫山高

巫山與天近煙景嘗青熒此中楚王夢夢得神

女靈神女去已久雲雨空冥冥誰有巴猿肅哀
音不可聽

折楊柳

纖纖折楊柳持此寄情人一支何足貴憐是故
園春遲景那能久流芳不及新更愁征成客容
鬢老邊塵

賦得自君之出入

自君之出矣不復理殘機思君如滿月夜夜減
清輝

奉和聖製幸晉陽宮

隨季失天策萬方罹凶殘皇祖稱義旗三靈皆
獲安聖期將申錫王業成艱難盜移未改命曆
在終履端彼汾惟帝鄉洪都信鬱盤一月朔巡
狩群后陪清鑿霸迹在沛庭舊儀覩漢官唐風
思何深舜典敷更寬家蒙粉榆復邑爭牛酒歡
緬惟剪商後豈獨微禹歎三后既在天萬年斯
不刊尊祖實我皇天文皆仰觀

奉和聖製次成臯先聖禽建德之所

天命誠有集王業初惟艱剪商自文祖夷項在
茲山地識斬蛇處河臨飲馬間威加昔運往澤

流今聖還尊祖頌先列賡歌安用攀紹成即我
后封岱出天關

奉和聖製過王濬墓

漢皇思鉅鹿晉將在弘農入蜀舉長筭平吳成
大功與渾雖不協歸浩實爲雄孤績淪千載流
名感聖衷萬乘渡荒隴一顧凜生風古節猶不
棄今人爭效忠

奉和聖製賜諸州刺史以題生右

聖人合天德洪覆在元元每勞蒼生念不以黃
屋尊興化俟群辟擇賢守列藩得人此爲盛咨

岳今復存降鑿引君道殷勤啓政門容光無不
照有象必爲言成憲知所奉致理歸其根肅肅
稟玄猷煌煌戒朱軒豈徒任遇重蕪爾宴錫繁
載聞勵臣節持答明主恩

奉和聖製送十道採訪使及朝集使

三年一上計萬國趨河洛課最力已陳賞延恩
攘博垂衣深共理改瑟其咸若首路廻竹符分
鑣揚木鐸戒程有攸往詔餞無淹泊昭晰動天
文殷勤在人瘼持久望茲念克終期所託行矣
當自強春耕庶秋獲

奉和聖製謁玄元皇帝廟齋

興運昔有感建祠北山巔雲雷初締構日月今
悠然紫氣尚蒼鬱玄元如在焉迨茲事追遠輪
奐復增鮮洞府香林處齋壇清漢邊吾君乃尊
祖夙駕此留連樂動人神會鍾成律度圓笙歌
下鸞鶴芝朮萃靈仙曾是福黎庶豈唯味虛玄
賡歌徒有作微薄謝昭宣

和黃門盧監望秦始皇陵

秦帝始來仙驪山河遽卜中年旣無效茲地所
宜復徒役如雷奔珍怪亦雲蓄黔首無寄命赭

衣相追逐人怨神亦怒身死宗遂覆士崩失天
下龍鬪入函谷國爲項籍屠君同萃元戮始掘
旣由楚終焚乃因牧上宰議揚賢中阿感速
一聞過秦論載懷空杼軸

秋夜望月憶諸侍郎 吏部侍郎李林甫

秋天碧雲夜明月懸東方皓皓庭際色稍稍
林下光桂萃澄遠近璧綵散池塘鴻鳳飛難
度關山曲易長揆予秉孤直虛薄忝文章握
鏡慙先照持衡愧後行多才衆君子載筆久
辭場作賦推潘岳題詩許謝康常時陪宴語

今夕恨相望願欲接高論清晨朝建章

和吏部李侍郎見示秋夜望月憶諸侍郎
之付其卒章有前後行之戲因命僕繼作
清秋發高興涼月復閑宵光遂露萃滿情因水
鏡搖同持亦所見異路無相招美景向空盡歡
言隨事銷忽聽金萃作誠如玉律調南宮尚爲
後東觀何其遼名數雖云隔風期幸未遙今來
重餘論懷此更終朝

和蘇侍郎小園夕霽寄諸弟

清風閭闔至軒蓋承明歸雲月愛秋景林堂門

夜扉何言兼濟日尚與宴私遠興屬薰葭變文
因棠棣飛人倫用忠厚帝德已光輝贈弟今爲
貴方知陸氏微

贈澧陽常明府

君有百鍊刃堪斷七重犀誰開太阿匣持割武
城鷄竟與尚書佩還應天子提何時遇操宰當
使玉如泥

酬周判官巡至始興會改秘書少監見貽
之作兼呈耿廣州

惟昔遷樂土迨今已重世陰慶荷先德素風慙

後裔唯益梓桑恭豈稟山川麗于時初自勉揆
已無兼濟瘠土資勞力良書啓蒙蔽一探石室
文丹擢金門第既起南宮草復掌西掖制過舉
及小人便蕃在中歲亞司河海秩轉牧江湖滋
勿謂符竹輕但覺涓塵細一麾尚云忝十駕宜
求稅心息已如灰跡牽且爲贅忽捧天書委將
革海隅弊朝聞循誠節夕飲蒙瘴厲義疾耻無
勇盜憎攻亦銳葵藿是傾心豺狼何返噬履險
甘所受勞賢惡相曳攬轡但荒服循垓便私第
嘉慶始獲申恩萃復相繼無庸我先舉同事君

猶滯當推奉使績且結拜親契更延懷安旨曾
是慮危際善謀雖若茲至理焉可替所仗有神
道况承明主惠

登南嶽事畢謁司馬道士

將命祈靈嶽廻策詣真士絕跡尋一徑異香聞
數里分庭八桂樹蕭容兩童子入室希把袖登
床願啓齒誘我棄智訣迨茲長生理吸精反自
然鍊藥求不死斯言眇霄漢顧余嬰紛滓相去
九牛毛慙嘆知何已

登樂遊春望書懷

城隅有樂遊表裏見皇州策馬旣長遠雲山亦
悠悠萬壑清光滿千門喜氣浮花間直城路草
際曲江流憑眺茲爲羨離居方獨愁已驚玄髮
換空度綠萋柔奮翼籠中鳥歸心海上鷗旣傷
日月逝且欲桑榆收豹變焉能及鸞鳴非可求
願言從所好初服返林丘

登襄陽恨峴山

昔年亟攀踐征馬復來過信若山川舊誰知歲
月何蜀相吟安在羊公碣已磨令圖猶寂寞嘉
會亦蹉跎宛宛樊城岸悠悠漢水波逶迤春日

遠感寄客情多地本原林秀朝來煙景和同心
不同賞留歎此巖阿

九月九日登龍山

郡庭常窘束涼野求昭曠楚客凜秋時桓公舊
臺上清風明日好歷落江山望極遠何蕭條中
坐留惆悵東彌夏首闊西拒荆門壯夷險雖異
時古今豈殊狀先賢杳不接故老猶可訪投弔
傷昔人揮斤感前匠自爲本踈散未始忘幽尚
際會非有欲往來是無妄爲邦復多幸去國殊
遷放且泛籬下菊還聆郢中唱灌園亦何爲於

陵乃逃相

登郡城南樓

閉閣幸無事登樓聊永日雲霞千里開洲渚萬
形出澹澹澄江漫飛飛度鳥疾邑人半艦艦津
樹多楓橘感別時已屢憑眺情非一遠懷不我
同孤興與誰悉平生本單緒邂逅承優秩謬忝
爲邦寄多慙理人術駑鈇雖自勉倉廩素非實
陳力儻無效謝病從芝朮

歲初巡屬縣登高安南樓言懷

山城本孤峻憑高結層軒江氣偏宜早林英粲

已繁餘滋含宿霽衆妍在朝暎拂衣釋簿領伏
檻遺紛喧深俯東溪澳遠延南山樊歸雲納前
嶺去鳥投遙村目盡有餘意心惻不可諉竭來
彭蠡澤載經敷淺原春及但生思時哉無與言
不才叨過舉唯力酬明恩美化猶寂蔑迅節徒
飛奔雖無立成效庶以去思論行復狗狐迹亦
云吾道存

登樓望西山

城樓枕南浦日夕顧西山宛宛鸞鷖處高高煙
霧間仙井今猶在洪崖久不還金編惟我授羽

駕亦誰攀簷際千峯遠雲中一鳥閑縱觀窮水
國遊思遍人寰勿復塵埃事歸來且閉關

登荊州城樓

天宇何其曠江城坐自拘層樓百餘尺迢迢在
西隅暇日時登眺荒郊臨故都纍纍見陳迹寂
寂想雄圖古往山川在今來郡邑殊北疆雖入
鄭東距豈防吳幾代傳荆國當時敵陝鄂上流
空有處中土復何虞枕席夷三峽關梁豁五湖
承平無異境守隘莫論夫自罷金門籍來參竹
使符端居向林藪微尚在桑榆直似王陵慙非

如甯武愚今茲對南浦乘鴈與雙鳧

登荊州城望江

滔滔大江水天地相終始經閱幾世人復歎誰
家子東望何悠悠西來晝夜流歲月旣如此爲
心那不愁

秋晚登樓望南江入始興郡路

潦收沙衍出霜降天宇晶伏檻一長眺津途多
望情思來江山外望盡煙雲生滔滔不自辯役
役且何成我來颯衰鬢孰云飄翠纓櫪馬苦蹀
躑籠禽念遐征歲陰向晚晚日夕空屏營物生

貴得性身累猶近名內顧覺今是追歎何時平

登古陽雲臺

庭樹日衰颯風霜未云已駕言遣憂思乘興求
相似楚國茲故都蘭臺有餘址傳聞襄王世仍
立巫山祀方此全盛時豈無嬋娟子色荒神女
至魂蕩宮觀 蔓草今如積朝雲爲誰起

賀給事嘗詣蔡起居郊館有詩因命同作


記言聞直史築室面層阿豈不承明入終云幽
意多沉冥高士致休澣故人過前嶺游氛滅中
林芳氣和茲辰阻佳趣望獨如何

與生公尋幽居處

同方久厭俗相與事遐討及此雲山去宵然巖
徑好疑入武陵源如逢漢陰老清諧欣有得幽
閑歛盈抱我本玉堦侍偶訪金仙道茲焉求卜
築所過皆神造歲晚林始敷日晏崖方杲不種
緣嶺竹豈植臨潭草即途可淹留隨日成黼藻
期為靜者說曾是終焉保今為簡書畏祗令歸
思浩

與生公遊石窟山

探秘孰云遠忘懷復爾同日尋高深意宛是神



優閑表政清林薄賞秋成江上懸曉月住來虧
復盈天雲抗直意郡閣晦高名坐嘯應無欲寧
辜濟物情

晨坐齋中偶而成詠

寒露縈秋空遙山分在矚孤頂乍脩聳微雲復
相續人茲賞地遍鳥亦愛林旭結念憑幽遠撫
躬曷羈束仰霄謝逸翰臨路嗟疲足徂歲方睽
携歸心亟躑躅休閑儻有素豈負南山曲

林亭寓言

林居逢歲晏遇物使情多蘅茝不特與芬榮柰

汝何更憐籬下菊無如松上蘿因依自有命非
是隔陽和

南山下舊居閑放

祇役已云久乘雨返服初塊然屏塵事幽獨坐
林間清曠前山遠紛喧此地踈喬木凌青靄脩
篁媚綠渠耳和繡翼鳥目暢錦鱗魚寂寞心還
閑飄飄體自虛興來命旨酒臨罷閱仙書但樂
多幽意寧知有毀譽尚想爭名者誰云要路居
都忘下流歎傾奪竟何如

感遇

蘭葉春葳蕤桂華秋皎潔欣欣似生意自爾爲
佳節誰知林棲者聞風坐相悅草木本無心何
求美人折

幽林歸獨卧滯慮洗孤清持此謝高鳥因之傳
遠情日夕懷空意人誰感至精飛沉理自隔何
用慰吾誠

魚遊樂深池鳥棲欲高枝嗟爾蜉蝣羽薨薨亦
何爲有生豈不化所感奚若斯神理日微滅吾
心安得知浩歎楊朱子徒然泣路岐
孤鴻海上來池潢不敢顧側見雙翠鳥巢在三

珠樹矯矯珍木巖得無金丸懼羨服患人指高明逼神惡今我遊冥冥弋者何所慕

吳越數千里夢寐今夕見形骸非我親衾枕卽鄉縣化蝶猶不識川魚安可羨海上有仙山歸期覺神變

西日下山隱北風乘夕流燕雀感昏旦簷楹呼匹儔鴻鵠雖自遠哀音非所求貴人棄疵賤下士嘗殷憂衆情累外物恕已忘內修感歎長如此使我心悠悠

江南有丹橘經冬猶綠林豈伊地氣暖自有歲

寒心可以薦嘉客柰何阻重深運命惟所遇循環不可尋徒言樹桃李此本豈無陰

永日徒離憂臨風懷蹇脩美人何處所孤客空悠悠青鳥跂不至朱鷺誰云浮夜分起躑躅時逝曷淹留

抱影吟中夜誰聞此歎息美人適異方庭樹含幽色白雲愁不見滄海飛無翼鳳凰一朝來竹花斯可食

漢上有游女求思安可得袖中一札書欲寄雙飛翼冥冥愁不見耿耿徒緘憶紫蘭秀空嘆皓

露奪幽色馨香歲欲晚感歎情何極白雲在南
山日暮長太息

我有異鄉憶宛在雲溶溶憑此目不覩要之心
所鐘但欲附高鳥安敢攀飛龍至精無感遇悲
惋填心曾歸來扣寂寞人願天豈從


閉門願祥化憑林結所思嘯歎此寒木疇昔迺
芳蕤朝陽鳳安在日暮蟬獨悲浩思極中夜深
嗟欲待誰所懷誠已矣既往不可追鼎食非吾
事雲仙嘗我期胡越方杳杳車馬何遲遲天壤
一何異幽嘿卧簾帷

當塗界寄裴宣州

故人宣城守亦在江南偏如何分虎竹相與間
山川章綬胡爲者形骸非自然含情津渡闊倚
望脰空延遠近聞佳政平生仰大賢推心徒有
屬會面良無緣日夕遵前渚江村投暮煙念行
祗意默懷遠豈言宣委曲風波事難爲尺素傳

敬酬當塗界留贈 宣州刺史裴耀卿

茂先寔王佐仲舉信時英氣覩衝天發人將下
榻迎珪符肅有命江國遠徂征九派期方越千
鈞或可輕高帆出風迥孤嶼入雲平遄邁嗟于



原件短缺

P 20

役離憂空自情飭簪陪早歲接壤厠專城曠別
心彌軫宏規義轉傾徒然恨飢渴况乃諷瑤瓊

別鄉人南還

橘柚南中暖桑榆北地陰何言榮落異因見別
離心吾亦江鄉子思歸夢寐深聞君去水宿結
思渺雲林牽綴從浮事遲迴謝所欽東南行舫
遠秋浦念猿吟

初發江陵有懷

極望涔陽浦江天渺不分扁舟從此去鷗鳥自
爲群他日懷真賞中年負俗紛適來果微尚倏

爾會斯文復想金閨籍何如夢渚雲我行多勝
寄浩思獨氛氲

南陽道中作

登郢屬歲陰及死情所適復聞東漢主遺此南
都迹佳氣藹厥初霸圖紛在昔茲邦稱貴近與
世嘗薰赫遭遇感風雲變衰空草澤不識鄧公
樹猶傳陰后石驅馬歷闔閣荆榛翳阡陌事去
物無象感來心不懌懷古對窮秋興言傷遠客
眇默遵岐路辛勤獎行役雲鴈號相呼林麇走
自索顧憶狗書劍未嘗安枕席豈暇墨突黔空

持遼豕白迷復期非遠歸歟賞農隙

使還湘水

歸舟宛何處正值楚江平夕逗煙村宿朝緣浦
樹行于役已彌歲言旋今愜情鄉郊尚千里流
目夏雲生

湘中作

湘流繞南嶽絕目轉青青懷祿未能已瞻途屢
所經煙嶼宜春望林猿莫夜聽永路日多緒孤
舟天復冥浮沒從此去嗟嗟勞我形

彭蠡湖上

沿涉經大湖湖流多行泐决晨趨北渚逗浦已
西日所適雖淹曠中流且閑逸瑰詭良復多感
見乃非一廬山直陽許孤石當陰術一水雲際
飛數峯湖心出象類何交糺形言豈深悉且知
皆自然高下無相恤

經江寧覽舊跡至玄武

南國更數世北湖方十洲天清萃林苑日晏景
陽樓果下廻仙騎津傍駐綵旒鳧鷖喧鳳管荷
芰闢龍舟七子陪詩賦千人和棹謳應言在鎬
樂不讓橫汾秋風俗因紆慢江山成易由駒王

信不武孫叔是無謀佳氣日將歇霸功誰與脩
桑田東海變麋鹿姑蘇遊否運爭三國康時劣
九州山雖幕府在館豈豫章留水淀還相閱菱
歌亦故道雄圖不足問唯想事風流

入廬山仰望瀑布水

絕頂有懸泉喧喧出煙杪不知幾時歲但見無
昏曉閃閃青崖落鮮鮮白日皎灑流濕行雲濺
洙驚飛鳥雷吼何噴薄箭馳入窈窕昔聞山下
蒙今乃林巒表物情有詭激坤元曷紛矯默然
置此去變化誰能了

出爲豫章郡途次廬山東巖下

茲山鎮何所乃在澄湖陰下有蛟螭伏上與虻
蜺尋靈仙未始曠窟宅何其深雙闕出雲峙三
宮入煙沉攀崖猶昔境種杏非舊林想像終古
跡惆悵獨往心紛吾嬰世網數載忝朝簪孤根
自靡託量力况不任多謝周身防常恐橫議侵
豈匪鵠鴻列惕如泉壑臨迨茲刺江郡來此滌
塵襟有趣逢樵客忘懷狎野禽棲閑義未果用
拙歡在今願言答休命歸事丘中琴

巡屬縣道中作

春令夙所奉，駕言遵此行。途中却郡掾，林下招
村氓。至邑無紛劇，來人但歡迎。豈伊念邦政，爾
實在時清。短才濫符竹，弱歲起柴荆。再入江村
道，永懷山藪情。矧逢陽節獻，默聽時禽鳴。迹與
素心別，感從幽思盈。流芳日不待，夙志蹇無成。
知命且何欲，所圖唯退耕。華簪極身泰，衰鬢慙
木榮。苟得不可遂，吾其謝世嬰。

夏日奉使南海在道中作

緬然萬里路，赫曦三伏時。飛走逃深林，流爍恐
生疵。行李豈無苦，而我方自怡。肅事誠在公，拜

可思。養真無上格，圖進豈前期。甘節往來苦，壯
容離別衰。盛明非不遇，弱操自云私。孤檝清川
渚，征衣寒露滋。風朝津樹落，日夕嶺猿悲。牽役
而無悔，坐愁祗自怡。當須報恩已，終爾謝塵縑。

詠史

大德始無頗，中智是所是。居然已不一，况乃務
相詭。小道致泥難，巧言困萋毀。穰侯或見遲，蘇
生得陰揣。輕既長沙傳，重亦邊郡徙。勢傾不幸
然，跡在胡寧爾。滄溟所爲大，江漢日來委。澄水
雖復清，魚鱉豈游此。賢哉有小白，讐中有管氏。

若人不世生悠悠多如彼

龍門旬宴得月字韻

恩華逐芳歲形勝兼韶月中席傍魚潭前山倚
龍闕花迎妙妓至鳥避仙舟發宴賞良在茲再
來情不歇

驪山逍遙公舊居遊集

君子體清尚歸處有兼資雖然經濟日無忘幽
棲時卜居舊何所休澣嘗來茲岑寂罕人至幽
深獲我思松澗聆遺風蘭林覽餘滋往事誠已
矣道存猶可追遺子後黃金作歌先紫芝明德

慶遂及私展力慚淺効銜恩感深慈且欲湯火
蹈况無鬼神欺朝發高山阿夕濟長江湄秋瘡
寧我毒夏水胡不夷信知道存者但問心所之
呂梁有出入乃覺非虛詞

奉使自藍田玉山南行

征驂入雲壑情始步金門通籍微軀幸歸途明
主恩匪唯徇行役兼得慰宸昏是節暑云熾紛
吾心所尊海縣且悠緬山郵日駿奔徒知惡囂
事未暇息陰論曉武經陳迹衡湘指故園水聞
南澗險煙望北林繁遠靄千巖合幽聲百籟喧

陰泉夏猶凍陽景畫方暎憇此高深極徒令夢想存盛明期有報長往復奚言

巡按自灘水南行

理棹雖云遠飲水寧有惜况乃佳山川怡然傲潭石竒峯岌前轉茂樹隈中積猿鳥聲自呼風泉氣相激目因詭容逆心與清暉滌紛吾謬執簡行郡將移檄即事聊獨歡素懷豈兼適悠悠詠靡鹽庶以窮夕日

使還都湘東作

倉庚昨歸候陽鳥今去時感物遽如此勞生安

有自來奕世皆秉彛豈與磻溪老崛起周太師我心希碩人逮此問元龜怡悵旣懷遠沉吟亦省私已云寵祿過况在華髮衰軒蓋有迷復丘壑無磷緇感物重所懷何但止足斯

祠紫蓋山經玉泉山寺

指塗躋楚望策門望荆岑稍稍松篁入泠泠澗谷深觀竒逐幽映歷險志嶇嶇上界投佛影中天揚梵音焚香懺在昔禮足誓來今靈異若有對聖先其可尋高星聞逝者遠俗是初心蘚剝經行處猿啼燕坐林歸真已寂滅留迹豈埋沉

法地自茲廣何云千萬金

郢城西北有大古塚數十觀其封域多是
楚時諸王而年代久遠不復可識唯直西
有樊妃塚因後人爲植松栢故行路盡知
之

蘋藻生南澗蕙蘭秀中林嘉名有所在芳氣無
幽深楚子初逞志樊妃嘗獻箴能令更擇士非
直罷從禽舊國皆湮滅先王亦莫尋唯傳賢媛
龍猶結後人心牢落山川意蕭疎松栢陰破墻
時直上荒徑或斜侵惠問終不絕風流獨至今

千春思窈窕黃鳥復哀音

戲題春意

一作江南守江林三四春相鳴不及鳥相樂喜
關人日守朱絲直年催翠髮新淮陽祗有卧持
此度芳辰

同綦母學士月夜聞鴈

棲宿豈無意飛飛更遠尋長途未及伴中夜有
遺音月思關山路風號流水琴空聲兩相應幽
感一何深避繳歸南浦離群叫北林聯翩俱不
定憐爾越鄉心

荆州作二首

先達志其大求意不約文士伸在知已已况仕
於君微誠夙所尚細故不足云時來忽易失事
往良難分顧念凡近姿焉欲殊常勲亦以行則
是豈必素有聞千慮且猶跌萬緒何其紛進士
苟非黨免相安得群衆口金可鑠孤心絲共焚
意忠仗朋信語勇同敗軍古劍徒有氣幽蘭祇
自薰高秩向所忝於義如浮雲

其二

千載一遭遇往賢所至難問余奚爲者無階忽

上搏明聖不世出翼亮非苟安崇高自有配孤
陋何足千遇恩一時來竊位三歲寒誰謂誠不
盡知窮力亦殫雖至負乘寇初無挾術鑽浩蕩
出江湖翻覆如波瀾心傷不林樹自念獨飛翰
狗義在匹夫報恩猶一殮况乃山海澤效無毫
髮端內訟已慙沮積毀今摧殘胡爲復惕息傷
鳥畏虛彈

在郡秋懷二首

秋風入前林蕭颯鳴高枝寂寞遊子思寤歎何
人知宦成名不立志存歲已馳五十而無聞古

人深所疵平生去外飭直道如不羈未得操割
效忽復寒暑移物情自古然身退毀亦隨悠悠
滄海渚望望白雲涯露下霜且降澤中草離披
蘭艾若不分安用馨香爲

其二

庭蕪生白露歲候感遐心策蹇慙遠途巢枝思
故林小人恐致寇終心如臨深魚鳥好自逸也
籠安所欽掛冠東都門採蕨南山岑議道誠愧
昔覽分還愜今無然憂成老空爾白頭吟

忝官二十年盡在內職及爲郡嘗積戀因

賦詩焉

江流去朝宗晝夜茲不捨仲尼在川上子牟存
闕下聖達有由然孰是無心者一郡苟能化百
城豈云寡愛禮誰爲羊戀主吾猶馬感初時不
載恩奮翼無假閑宇嘗自閉沉心何用寫攬衣
步前庭登陴臨曠野白水生迢迓清氣竒瀟灑
言采芳澤多終朝不盈把

二弟宰邑南海見郡鴈南飛因成詠以寄
鴻鴈自北來嗷嗷度煙景嘗懷稻梁惠豈憚江
山永小大每相從羽毛當自整雙鳧似晨泛獨

鶴參霄警爲我更南飛因書至梅嶺

將發還鄉示諸弟

歲陽亦頽止林意日蕭滅云胡當此時緬邁後
爲客至愛孰能捨名義來相迫負德良不貲輸
誠靡所惜一木逢屢構纖塵願山益無力主君
恩寧利客卿壁去去榮歸養憮然歎行役

叙懷二首

弱歲續群史抗迹追古人被褐有懷玉佩印從
負薪志合豈兄弟道行無賤貧孤根亦何賴感
激此爲鄰

其二

晚節從卑秩岐路良非一旣聞持兩端復見挾
三術木瓜誠有報玉楮論無實已矣直躬者平
生壯圖失去去勿重陳歸來茹芝朮

雜詩五首

孤桐亦胡爲百尺傍無枝踈陰不自覆脩幹欲
何施高岡地復迥弱植風屢吹凡鳥已相噪鳳
凰安得知

其二

蘿蒿必有託風霜不能落酷在蘭將蕙甘從葵

與藿運命雖爲宰寒暑自迴薄悠悠天地間委
順無不樂

其三

良辰不可遇心賞更蹉跎終日塊然坐有時勞
者歌庭前攬芳蕙江上託微波路遠無能達憂
情空復多

其四

湘水弔靈妃班竹爲情緒漢水訪遊女解佩欲
誰與同心不可見異路空延佇浦上青風林津
傍白沙渚行吟至落日坐望祗愁予神物亦豈

孤佳期竟何許

其五

木直幾自寇石堅亦他攻何言爲用薄而與火
膏同物累有固然誰能取徑通纖纖良田草靡
靡唯從風日夜沐甘澤春秋等芳叢生性苟不
夭香臭誰爲中道家貴至柔儒生何固窮終始
行一意無乃過愚公

題畫山水障

心累猶不盡果爲物外牽偶因耳目好復假舟
青妍嘗抱野間意而迫區中緣塵事固已矣秉

意終不遷良工適我願妙墨揮巖泉變化合群
有高深侔自然置陳北堂上倣像南山前靜無
戶庭出行已茲地偏萱草憂可樹合歡忿益蠲
所因本微物况乃憑幽筌言象會自泯意色聊
自宣對翫有佳趣使我渺綿

張曲江詩集卷之終

